



10231

序

向氏家序

國朝

不諱

向氏家乘之緒谿向氏之宗譜也向之先出於春秋

宋公族成至趙宋文簡公有家譜見夾添鄭氏藝文

畧中裔孫從高宗南渡譜逸紹興中名有恒者自餘

姚徙慈谿凡四傳至朴分居前宅則又為前宅之向

洪武間舉賢良為獻縣令建文時靖難師起不從

節義文章甲于他族再傳至秉直為安福教諭

輯斯序嘉靖己丑秉直曾孫子壽重為修緝其世

卷十三

何鯨

系昭穆嗣絕諸凡立刑部員外郎邑人葉

敦叔序之詳矣至是向之嗣孫御史君程復請序於

余余尚何言哉竊惟向者因生賜姓胙土命氏而

狀譜系必置局設官以掌之豈惟明貴賤別等威云

爾哉夫亦有至意存焉若先王賜姓命氏固以崇德

報功而定其夫象賢之意欲嗣其後者經而思之以

保宗祊也使為之子孫者不念先世踈擯族屬視如

路人固不足論已其有知重本原尊祖敬宗一族而

周窮恤賈斯亦可矣然或溺於親愛唯事姑一恃其

世望罔知檢繩以貽祖宗之辱者蓋亦未為得也彼



晉之主謝唐之崔廬厥初豈不盛哉迨後繼承弗類而闕閔夷於編氓冠冕淪于輿阜雖有譜牒將奚施焉此蘇明允族譜亭之記所以拳拳以禮義爲訓也向氏在我國初獻縣以文章節義起家追而上之在平公時則有左師在真宗時則有僕射二公皆爲世名臣光於史牒匪直家乘焉而已宗洛今爲名御史仕途遠到學行進修蓋當不啻如二公焉者其尚表率宗族必無負於先世則其爲斯譜之光也大矣余於御史君有相成之義故於斯譜併爲其族人勗焉

皇明百家詩序

石齋卷三

二

序

昔人謂文章關乎氣運而聲音與政相通豈不信然哉乃若詩以言志固文章之英華而聲音之橐籥也先王陳之以觀風諸侯貢之以獻俗寔以寓慶讓黜陟之典而扶世立教之義蓋莫大焉使其末藝細故而無益於理亂則古昔盛時之君相方設官立政體國經野之不遑何乃爲此不急之務邪周室東遷政教號令不及於天下行人不采風樂官不達雅而各國卿大夫交鄰聘問猶以微言相感揖讓之間必稱詩以論志蓋以別賢不肖而盛衰隆替亦將於是乎

徵焉春秋之後聘問歌詠不列於侯國學詩之士逸
在布衣而閭巷之辭無復上達漢武立樂府而采歌
謠於是有趙代之謳秦楚之風亦可以觀風驗俗而
知厚薄延至魏晉六朝多緩弱綺靡之詞沒風諭興
感之義唐人以詩取士作者輩出風流習尚大雅日
漓而藝林詞客顧皆極口推尚模擬誦法嘗自以爲
不及蓋七八百年于茲無有異議直謂宋人無詩元
以來雖學唐總不能得其肯綮此其言若出一口而
於身心性情世教民彝關係與否置勿論也嗚呼亦
甚乎其惑且誕也久矣吾友是堂俞君謝憲長家居

杜門溫繹舊所讀書間乃盡索我 明諸名人詩彙

次成編凡數百家家爲刪定綴以小序題曰皇明百
家詩以彰昭代人文之盛刻成屬余序之余謂俞君
平生規爲經畧欲有爲於時而弗克究其志以歸掩
目淵潛於世若無涉凡所以維持世風警切時事者
有不能以但已也其爲是者蓋自附於古人陳詩采
風之義而豈爲騷人墨士立赤幟哉夫苟取其所編
而徧觀之則我 明自開國以至於今氣隨運復文
與時遷而人品士類污隆高下一諷詠之間可以知
其大都矣秉陶鈞以斡旋元化一匡皇極者將不有

徵於是邪余故歷述詩之爲教以明俞君之所以集是編者匪直藝焉而已也

貞節錄序

憶歲辛亥余視學兩浙歷嘉之桐鄉得一穎異之士今原泉馮君子漸儲之學宮明年壬子大比合一郡之士而羣校之千百卷中其有績學藝文達於名理者蓋僅僅見也於桐復得一焉撤封乃卽子漸時子漸年甫十六七余大奇之究其所自則三歲而孤寔其母張夫人居貞勵節茹苦食貧撫育教誨所致余聞之歎賞不能置時一擊節焉有司以年例未及姑

緩薦童會

今上龍飛詔天下忠臣孝子義夫節婦

皆得上聞於是子漸適舉進士遂上書叩闕陳母貞節狀勅下所司庶得其實遂賜詔表厥宅里以風四方

方四方學士大夫樂道人善者各爲詩若文以章母

貞節子漸乃彙集而刻之示余山中且拜請曰先生素以聖賢之學淑羣弟子以忠孝節義之行化導區

宇今雖謝事於世無涉矣若孤之母固夙所聞者能

無一言以序斯集乎余受而歷覽之感今思昔乃重

有慨焉昔人謂天之所祐者順人之所助者信豈不

信然哉方馮母之守節時家貧子幼零丁孤苦蓋無

聊亦甚矣是時恩權隆赫之家威福玉食以誇耀中外者勢如燎原正張張甚也乃今撲滅無餘矣馮之母子則膺顯錫享榮祿以起家昌後而君恩士論上下咸歸天人感應之際固若此哉夫母之貞節斯集亦云備矣余不佞辱子漸之知更有言焉孟氏之母以子輿而益著尹氏之母以彥明而愈芳子漸今筮仕守太倉太倉沐浴膏澤而鼓舞德政者固已擬之穎昌渤海矣自是進而爲公卿亦常事也尚願尋向上去俾母夫人與孟尹二母並傳則斯集永永其不朽矣

南豐曾氏族譜序

余昔爲南考功保全諫官忤權相意指謫判江西之建昌山郡事簡日與諸生論學於道一書院而南豐曾君翔龍亦時入郡城相質問知其爲志學之士也越二十餘年曾君來爲吾常教授卽以其所修曾氏族譜示余請序余授而編閱之其諸傳記志銘則盡宋元之名公鉅儒其文章燦爛不啻若入瓊林大盈之庫而珍異雜沓矣余謂曾出於郟國公之後自都鄉侯據南徙代有顯人至於子固伯仲遂以文章名天下當時識者謂其本原六經自後司農少卿紆亦

以辭章稱君子謂如魯殿秦碑司農從孫季狸在乾道淳熙間又大肆於文爲羣公之所敬服則其後先輝映蓋已照耀古今雖無諸公之文亦自不朽而矧余衰謝又何足爲斯譜之重輕哉故雖諾而未卽成文也今且三年矣教授君以親老在念上書監司懇乞歸養乃詣余山中固申前請余惟宗法不行於天下而故家士族所賴以維繫永久而不至於渙散者以有譜耳曾君汲汲於修葺者固尊祖敬宗收族之義而仁人孝子之用心也余則以曾氏之譜其關係於後人者蓋不特止於此而已郕公親承吾夫子之傳而獨得其宗厥後僅以文章顯蓋不免襲第二義矣嗣其後而覩斯譜者安知不興水木本原之思乎誠一思之則由六經之文以邈一貫之旨者未必不由於斯譜也爲之序

遵巖文粹序

遵巖王子文集近多刻本龍岡施君謂其卷帙浩繁乃約而刻之題曰遵巖文粹問序於薛子薛子追惟遵巖少時穎異總中舉進士高第人固已竒之旣而荆川唐子與之遇於京師相見大悅謂其文類南豐曾子固亟稱於人士前自是遵巖之名日聞四方乞

言者屢集戶外而文遂傳播海內矣夫我明一代之文寔自宋滸溪方遜志倡之二公精詣絕識根極理要其爲文度越前古不啻商彝周鼎匪直一代之冠冕而已迨至弘德間習尚旋流識趣日溺於是李獻吉何仲默各以文自負一時人士尠有定見亦遂翕然歸之何之言猶或近於理道李則動曰史漢史漢一涉於六經諸儒之言輒斥爲頭巾酸餡目不一瞬也夫史漢誠文矣而六經諸儒之言則文之至者舍六經諸儒不學而唯學馬遷班固縱文類史漢亦末技焉耳何關於理道何益於政教哉邇數年來其

說日益熾摹擬者日益衆而文日益陋矣乃思荆川子往稱遵巖之文類子固者豈直以子固之文爲極致哉蓋以昔人謂子固文章本原六經要之非誣而遵巖高才殊質豈不能凌跨西京掩迹東都其文乃獨與子固相類者蓋不溺於習尚不逐於時好而卓有定見其於道也幾矣唯是以唐子亟稱之也所謂可與知者道也循是以入而國初文運之盛可紹復矣龍岡君之刻是也無乃亦唐子之意也乎余固樂爲之序

見雲劉公以名御史按江左肅僚貞度風紀區域以
士爲民先尤加意作興每巡歷郡縣必進學校諸生
而迪以正道校其藝而以鳴之其有從游者則儲之
子中吳書院日課月試踰年行經書義若干篇錄而
刻之謂詩義唯常熟武進爲多而詩且有常武之篇
遂題曰常武錄問序于薛子余追惟少時與吾武進
荆川唐君常熟昆吾瞿君各以詩爲業訪前輩守溪
王文恪公所爲詩義而準馴之既而二君先後以詩
魁南宮入史館有名於是兩邑之士業詩者遂衆而
人文日盛亦漸以靡溫柔敦厚之音未免稍有損益

見雲公於書無所不讀尤專于詩覽兩邑諸生之詩
義而耳提面命抑其過引其不及遂駸駸乎復雅還
淳而雅頌之六義或敷暢而婉或簡古而嚴各得體
裁凡載於是錄者可以訓可以傳矣於乎盛哉雖然
余更有說焉常熟古之吳會子游所產武進古之延
陵季札所封皆以禮樂見稱於夫子今茲兩邑之士
郁郁乎文矣豈直藉之以取高第而已哉由詩而興
至於立禮成樂以上窺聖賢之蘊奧誠之於思則正
授之以政則達閭俾游札專美於前則文以道顯地
以人勝增光先哲而常武相望爲古今之所並重矣

誠若是焉庶不負見雲公德造之至意而斯錄必求有聞於後也吾願吾諸士更相與懋哉

詩經文稿序

今場屋之制以四書五經義取士蓋將因言以究其所養而義非言之精者不能售也詩之爲教溫柔敦厚而肄業以陳諸義者其體裁與四書諸經微有不同而國風雅頌亦自有別蓋必敷揚演繹各適條理斯得詩人之指而凡直致徑情者舉未可與言詩義也我成弘間前輩業詩者大都按其體裁而正德中嘉靖初猶循襲其遺焉迨後多肆意逞言而詩之爲

義寢失其傳矣今年秋太學生董用興刻肖野郭君所著詩經義屬余爲序余受而閱之見其於風則巽以入而二南各國之音殊於雅則典以整而大小之節辨於頌則美德告功而周商魯之分明隨其經緯而寓意措詞風乎擬諸其形容者宛然如在當時而親接其人親蒞其事誠有所感發懲創而不能自已者信非深於詩者不能也故君之施於體而喻授之政而達蓋有所自來也豈直可以應制決科而已哉用興固業詩而有得者宜乎其深嘉樂予餞諸梓以公諸人人也讀詩者於是稿而反覆詳玩焉當自

知其可以爲訓而余言之非譽矣爲之序

四書三妙集序

四書三妙集者見臺蔡子集四書時義而其伯兄春臺公命之名也刻成屬薛子序諸簡端夫所謂三妙者何以言乎理則明以言乎氣則昌以言乎詞則達斯之謂三妙也蔡子是集誠可謂兼之矣以是而取科第則舉業卽所以爲德業又何妨功輦志之爲患哉余則以爲是三者之妙未可以襲取而強爲也未可以兼舉而進也蓋有要焉唯明乎理而已矣理明則其氣自昌其詞自達所謂得之於心而應之於手蓋有莫知其然而然者矣夫妙不可以言傳而輪扁斲輪之說固可以默契也余嘉蔡子集是文以公諸人而因闡妙之爲義以爲覽斯集者告云

毘陵雅義序

余四三年前見鄉試刻文有不成章者不覺有出位之憂遂貽書石鹿李公謂其 鈞以鼓鑄區宇不宜使文體至此石鹿復書乃亦虞之謂舉業卽所以爲德業而文章與氣運相通人才之取舍世道之污隆係焉此蓋體用之學誠不可以不爲之慮也旣而禮闈錄出精切古雅一革近時相沿之陋習於是四

方有識之士莫不顯顯嚮風躍然興尹曰庶幾復見前輩之典刑也此可見轉移之機在上不在下有如此哉今龍岡施公出守吾常政事之暇課試各學諸生簡其文之可觀者命坊間刻之題曰毘陵雅義意余序其端余惟士人之所趨視主司之好尚數年前後事剽竊者易售務實得者或遺宋史選舉志中所謂謬種流傳者幾於蹈之矣幸當路者覺焉而急返之也然而勢重難返溺意乎冗者尚天之靡妄意簡短者尚失之畧龍岡公以雅義爲尚則顧名思義去必知所尋向而以雅爲歸日引月長造理經世之方殆將於是乎出而不負設科取士之初意矣誠若且焉龍岡公豈時有大造於吾黨口文運轉移之功小補云乎哉

進菴文集序

進菴華子師魯前職方大夫水西公之子也職方南京解元登進士而文學政事爲一時縉紳推重然竟不究其志而歸歸又享年不永師魯靡瞻之懷時切於念思繼其緒而益進之於是從事身心之學而擇交問友非其人不與雖在膠庠而諸博士弟子與之合志者亦僅僅有數博學精思務請其裨其於藝

律對耦之業蓋非其所屑居以故屢試於鄉

而安兮素位縕袍菽水日與膏粱文繡者相對

不一聯君子固已許之矣及其有所自得引援筆

書人或乞言則據事與理答之久之成帙而吳明

待詔與其族之長老若嵩峯副憲補菴刑部者則

咸爲之品題而亟稱之於人士前謂其闔

據理道而非逐時狗習之作也至是出以示余且

序之余少與職方同游學乃壯而涉獵世途則亦

時所擯唯師曾則數數顧余於草叢林之下寂

無聊之中知其好尚真與世殊趨者也乃今得斯

而究觀之其所爲詩若又一如其人而邇來侈張詎

漫之徒交錯於道路自相誇詡者以而並觀之

誠僞較若白黑矣余嘗謂先秦之文六朝之濫觴也

大風鴻鵠之歌子夜吳歌之藥也故曰蕢桴土鼓

斯爲至音太羹玄酒斯爲至味風行水上斯爲至文

是集不模擬以爲竒不雕琢以爲工而言由衷語

唯據實遡而上之庶幾乎文之至者矣待詔諸公之

品題豈誣也哉余是以益歎職方公之有後也

尚友堂新藁序

尚友堂新藁序

無錫毅所龔子讀禮家居諸生多從之游乃闢城南

書院崇尚公堂以夕

業之所薛子嘗一過焉

竊歎教以其賢矣哉一不受變於俗者也前數十年間海內講學之士所在興起時未究其直積實踐如何然既從事於此猶知理義之大防而未敢顯然有犯於清議不幸一二作偽者出焉依附名流其言津津若可聽而卒聖乞播靡不爲之自是不厭衆心而一涉於講學者則羣斥之曰此攘竊之流也邇來有志者亦遂以講學爲諱而其諸士人益無所忌憚章縫之流且日淪於市井矣其幸存而未泯者舉少之文猶可以窺聖賢之餘緒而主司之好尚不一

遂致取辨於口耳漫不關於身心美談者擬之爲質身羔雉諺語者目之爲擊門瓦甃其有號稱知文者則曰此趨時之具也何必學於古訓哉正不知所謂時文者乃時王之制而非逐時之時也斯義不明而昧於趨向遂無所適從矣嗚呼學既不講文又失傳開科取士將何賴哉此謬種流傳宋人所以虞之也教所志於理學而日激中豈無憂世憫俗之心然而不爲憤世嫉俗之言不爲驚世駭俗之行而舉策以取科第固世俗之加馳騫而諸生之所汲及焉考也遂因其所有事而引之以進於道其於勢也便

其力也易而心知性術之蘊精微嚴密之指將漸
摩淪浹而天光自發日入於聖賢之堂室矣朱子嘗
謂用其體式而槩括以至理此科舉之文訣也余觀
毅所之文蓋深有得於晦翁之旨而良工獨苦之心
誰則知之余故序而傳之且爲二三子告也毅所未
第時已有舊藁故此曰新藁云

憲章錄序

夫書監成憲詩率舊章豈其爲訓若是之拘繫哉寔
以隆古盛時其君臣之交脩以圖至治者皆由此道
而事不師古者鮮克永世也昔仲尼適周不獲一見

古文集卷三

三四

張本

天子歷聘列國于七十餘君不用於是退老於洙泗
之上從游之士蓋三千焉皆盡一世之英賢相與論
述三才表章六籍以爲明體之學而其最適於用者
則因魯史以作春秋而褒貶賞罰者無非當世之實
事予以定百王之法予以立萬世之防蓋皆自其憲
章文武者推之也故一則曰吾從周二則曰吾從周
其東周之志周公之夢雖不獲見之施行而端倪已
可槩見矣然猶自歎曰與其托諸空言不若見諸行
事之深切著明也其惓惓愛君體國之心曷嘗一日
自也哉游不類雖少知誦法孔子而生於二千一百

餘幸之後固不及揖讓於顏曾閔冉之列且不及如
互鄉闕黨猶得以望見於門墻然而一念天假之靈
則終不能泯沒故自鼓篋以至入仕凡我 昭代之
成憲典章或紀載於館閣或傳報於邸舍見輒手錄
歷有歲年幾於充棟妄意當可爲之際或可以備叅
考竟以迂愚牴牾當路歸卧窮山而平生之欲監觀
率由將斟酌以見之獻納者遂寔爲虛器恒竊悲之
邇來見通紀做編年而蕪鄙吾學編効紀傳而斷落
遂不辭衰憊盡出舊所錄者摘什一於千百彙爲斯
編與經世者共之題曰憲章錄 竊附於從周之義
也倘假我數年再加刪潤當獻之 君相值茲不諱
之 輒用効涓埃之報庶少裨法 祖之一助茲懼
僭妄聊以質之同志云

白雲司又稿序

余昔視學兩浙在錢塘得一士焉曰陳君思貞篤信
好學於書無所不讀而發爲文章邁古作者余固已
嘉之矣旣君典教雲間晉陟成均而中外士人咸稱
得師茲爲南司冠郎議獄詳慎淑問明允有古士師
之風是君體用之學固隨所施而輒效人皆信其爲
敦行君子無異詞也君平生無汎語獨嗜吟詠故其

爲詩發於性情止於禮義卽其篇什雖體裁不同類
多風雨雞鳴之思賢蟋蟀日月之勤事而宛然得詩
人之指非若近世之馳騫詞章者惑於嚴滄浪之說
而務爲水中之月鏡中之影流連光景不自知其無
益也夫以君之詩若是而其兄敬亭公猶謂詩能誤
人則知君之得於家庭者旣多小宛相戒之情而中
江莫公序君之詩亦原君撰著所繇又多伐木相成
之義余昔在南宮與二公相知乃後與君又叨師友
之列故於二公之言重有感焉而不能不爲君申告
之也君寄余詩有白雲司集有復生子草有北行稿
諸各有序唯白雲司又稿尚未有品題者乃屬余序
之云

方山薛先生全集卷十四

序

送陳思南序

南營繕郎二峰陳君擢守思南其冬曹僚友詣薛子屬爲文贈之薛子乃爲言曰君子之任也以行道也道弗行焉雖密邇禁嚴薦陟華要威焰寵渥焱騰波流衆人侈之君子弗願也道苟行焉雖淪迹幽遐屏居踈絕懷遠招攜左支右吾衆人難之君子所安也故曰君子以道衆人以欲欲之所至業毀名湮道之所至驕字褻淳此豈待聰明強有識者然後能較得

失重輕於彼此聞哉夫亦人心之所同明也然人情竟往往厭此趨彼者無亦眩于耳目之所睹聞世俗之所習尚而旋不自覺與於是能有卓然自立期於道之必行而不俛仰汨沒於庸衆人之見者吾不無望于思南君此行矣夫思南爲禹貢荊州荒裔歷代撫綏羈縻建置興廢沿革靡一追我明興豐德厚澤洪敷汪濊固已效順輸忱樂歸編戶至稽其種類華夷雜居輕生尚武終自與中土殊別唯是官茲土者率以孤臣自處多抑鬱無聊而甘心怠忽鮮克自樹是不有忠信禮樂曠度達觀之士志於行道不以

夷險遠近動心者未見其能守也吾觀君詳慎恭確
罕所嗜好奮身賢科閱歷歲年始至營繕職司興作
軫念土木凡奉先殿材顯陵陶磚皆教護屬工節
量程督罔有冗費以是推之則安節厚生乃其素定
而經度機宜撫綏振率將無施不可何有於恩南哉
始楚威王時莊躋定黔中從其俗以長之民遂殷富
漢晁錯當景帝朝規畫塞下事甚悉而卒歸之於得
良吏吾嘗以爲二子之見於今之守遐方邊郡者最
爲切至君茲往哉酌古今權便宜而發謀攄慮一無
顧望唯不負其平生則思南之民有不謳歌者寡矣

道行荒服策名徼外將不愈于官禁近而碌碌無所
猷爲靡益成敗者邪君其往哉諸僚重別之情與夫
贈言者之意他日諒有徵焉也

代送張龍湖先生校士北還序

代鍾石
公作

天之生才曷嘗有古今踈數之異哉元化旁流鈞旋
轂轉章符耀采著秀呈祥而靈淑之萃聚寔委和之
凝激也故含淳秉德蓄玄抱藝之士冀遭時翊會以
宣猷効悃者恒濟濟乎其相望焉若其用舍之衡進
退之幾則惟幹元化者操之而世道之汗隆升降胥
此焉出是可不慎乎哉蓋淳者不能不濟貞者不能

不變而聲應氣求捷逾影響至可畏也是故唐虞而下得人之盛莫過周室稽其賓興則惟以德行道藝后世茂才孝廉明經辟舉諸科其法加詳而比其在位多弗類古此豈其制弗若哉蓋天下之道有定體無定用有治人無治法周之得士非其制之獨良也當時閭胥族師黨正州長凡與賓興之役者咸德行道藝之士也后之不古若者非獨其制之弗古也郡國公府列侯二千石凡有貢舉之司者或多不得其入也不然文詞之學科舉之制去古逾遠何韓愈氏出遂起其宗歐陽修氏出遂正其習是不可以觀邪

龍湖先生蚤以學行名兩服舉禮闈第一人成進士歷翰林學士青宮諭旨職專輔導海內學者靡然嚮風先歲甲午被命校《南畿時》得人至是庚子例復設科先生乃再至寔殊命也 聖天子虛懷圖治

思得賢俊共成化理淵衷至意豈其微哉維南畿爲我 國家根本一 地其人才自昔著稱與其財賦並甲二天下充盈羨溢之餘侈靡浮競之習日滋張大

矜炫多文少實以故聰明才辨者或多馳騫口耳而朴實推魯者則又旋爲風漸俗染唯是極重難反雖今閭井日就凋縮而羣好翕趨于迷嚮赴厥有好學

聞道窮高極微而藝文摘蘊輒憂深思遠抗志沉精
往往爲時所擯是導揚行溢者日異月殊而人才之
上下文運之盛衰可獨歸之氣數耶唯先生型范端
飭鑒衡空平眡畧旻觚翰以得心知性術而登崇陟
雋者率多譽望聲實之彥砥壁始璞鑄金始鑛豈直
良工巧冶之能事哉冥孚潛運雷動雲蒸固其聲氣
之相感也茲其歸哉持賢書以獻諸明堂 聖人在
上方將邁殷軼周可無煩傳巖物色渭濱后車而側
席之憂庶幾其慰矣乎

代送李尚書序

方山書卷之四

四

何啟

嘉靖十九年庚子夏戶部尚書儉菴梁先生免歸進
南工部尚書涖涯李公往代之瀕行南郊大夫士咸
餞送郊外迺公官屬請余贈之言於是某前致辭曰
今之戶書寔古司徒之職古以掌教今以經費費不
經則財匱財匱則民困民 而教是不可行也方今
聖天子銳意復古修舉廢墜工役繼興儉菴先生爲
國經費爲天下阜財稽數考成勢不能行於是再起
再罷去 上以其職授李公淵衷睿注豈唯以公宏

猷大畧達變通方爲能任厥成事哉蓋寔諒公之素
矣公共起家進士出宰廷昌安福卽有惠政旣召爲

監察御史按滇南值正德初逆瑾竊弄威福中貴專恣凡出鎮守者皆其黨與公在滇裁抑之因謝病歸者十餘年瑾誅後起公爲廣西按察副使備兵撫江遂進御史中丞鎮撫寧夏邊人帖息是公之才望雖逆臣強虜咸知畏服以是而總度支經出納程工量才以差次乃直別能較藝以上下其旣稟則百度咸真羣工競勸而冒破乾沒者將自斂戢如是而財可裕財裕則用足用足而工役可就民力可舒矣此

不會世子以下皆會夫世子將君天下其諸僕臣侍御又與王出入起居凡所意欲咸得關白而司會以太宰之屬顧獨能抗其法而不聞有阻逆之者蓋當時太宰寔唯周公其人而厥德明光于上下衆志自爾協一罔有希覬故雖遷都營洛悖宗將禮費給不貲而內府外府靡不充溢閭閻田野見于詩人之所歌者萬億及秭乃今司會之政統之司徒宿望如公信能以周公之道康其國而默旋宏濟則財用自無漁獵不惟上副

聖天子之委任而因可以足國裕

民盡古司徒之職矣余雅知敬公故於諸察之請竊

有厚重而不敢以漢唐以下之度支尚書望公也公
其說哉

代送費鐘石先生序

代石塘
公作

自昔周成康時天下方被文武光烈二君又皆繼體
持盈號稱極治迺周公召公猶且惓惓以克詰戎兵
張皇六師爲訓此豈老成謀國長慮却顧者固如是
哉今天下承平日久濶畧戎政雖介冑氏族襲先世
勲賞封爵日執干戈衛社稷固邊隅爲職業者亦往
往多燕溺紈袴不省弓矢刀劍矧能閑韜畧習機宜
宣猷矢謨以折衝禦侮邪頃醜虜竊發犯我邊陲

天子命將閱師適缺少司馬參謀本兵下廷臣議僉
曰南少宰鍾石費公維其人公固講筵舊臣宸衷久
注遂可之或謂公文學侍從資望已深且久在南國
卽當入直顧問軍旅之政乃復以煩公邪竊惟人有
恒言漢唐而下縉紳介冑分爲兩途迂儒武夫各持
一說維是率多積事不知先王用人必文武兼資而
論將搜才咨詢決策一聽之耆儒宿學蓋唯文斯能
經武唯閱歷深斯慮事遠唯久任在外斯知人必真
是故本兵得人則將領多賢而分闡專制兵政悉舉
不得其人則將領多不賢越法濤張以啓釁召侮

是軍國之安危休戚華裔之盛衰消長皆由此出其
所繫豈細故哉鍾石公博雅謙冲正直忠厚自與進
士入史館已赫著譽望吾不論其他至如正德中乃
伯兄文憲公秉國逆濠方熾跪請護衛公卽虞其有
變從中抗阻濠怒中公昆弟家居老凡若干年使當
時在位者皆若公見必能潛奪其不軌而勤兵毒民
未至後來若此之甚也及濠敗始復起公編修國史
尋遷侍講寺坊茂子寧翰南院歷官祭酒模範諸士
寔多造就及上䟽條陳事宜咸中寺宗 上嘉納之
調止 公酒以文憲公乃召入輔相遂懇爲辭辟且寓

書薦呂涇野以自代茲可以類觀公矣乃今叅掌邦
政其必發摠生平所蘊畜以決大謀定大事而古稱
詰姦禁暴九伐平邦之法固將推而行之以靖彊宇
而逆折豫弭 道以人事君之心又公之所素具也
豈得以文章藝苑目公而謂不當煩公以此哉不觀
趙括兵家子指掌談兵雖其父奢不能難然竟不免
長平之敗厥後梅聖俞條然一儒臣也乃注孫武子
而後世用兵者多取資焉蓋會通之學則固有如此
者矧公兼綜典籍究觀 已歷有歲年而切切以治

道人才留意者乎吾固知公隨所授而可以行其學

矣嘗觀宋慶曆初仁宗厭西兵久出亟用富韓范三公而杜祁公相與佐佑抑絕僥倖凡內降恩澤一切不與及范雍守延州當時欲以趙振代之韓魏公奏曰願留雍以觀後效無已則范仲淹爲可是其經畧邊事者固非一端而其要則莫先於用人所以慎重若此余知公最久且同事南部故於公茲行反覆以用人言之而惜別之私則有未暇及也

代送戴巡撫序

龍山戴公以按察副使備兵九江甫明年經畧區畫咸協時宜閱武修文教寧江漢晉秩叅貴州藩司政

戒行會畿內暨薊州邊備撫臣員缺天曹疏請猷望素著者蒞之上乃復晉公僉都御史授璽書往某

爲公屬義不可無言遂叙曰維今京師乃古幽冀雖

形勝甲天下寔爲次邊地北抵居庸東北抵古北口

西南抵紫荆關驅策舉踵不出旦夕匪若漢唐之咸

陽長安去朔方吐蕃界在千里外我文皇帝聖謨

神畧建都以扼虜衝而薊州寔秦漢以來漁陽幽玄

諸郡勢阻要害設倉儲屯戍制置勅使遠慮豫防緩

急調發厥繫攸重非有文武長材諳練絕濟者弗得

授公茲往豈直懋九江官賞後一方勲業云爾哉唯

我明天子暨左右輔理諸執事慎簡臣僚諒公有素憶公昔嘗爲侍御史督理兩淮離政條陳地方事宜所關最切者十二事釐奸剔蠹裕財阜民至今稱便繼按歷西川值夷酋隴氏倡亂遠近繹騷致勤

上命將大舉兵以夷其族方歲大旱民不堪命公先後上疏請罷兵發粟上下廷臣議遂召旋師仍發

內帑金二十萬往賑蜀公又檄諸州出倉粟數十萬石民賴以全活旣乃復自成都渡瀘會貴州守巡于赤水布悃聲威兵不血刃而遠人咸格因建處芒長策今公去蜀殆逾一紀而川貴之謳吟思慕冀復得

公者不啻饑渴前日藩叅正以俯順一方而畿輔重地則又非公不可遂尋有是命委任至意豈其微哉矧今三邊六鎮自石晉獻地盧龍遂割太阿倒持積有歲年迨大寧東勝旋改其舊藩籬屏翰不無隱虞昔范仲淹呂夷簡當景祐中正有宋極盛時一欲城洛陽一欲城大名雖二公所見不同均爲大臣慮遠防微至計乃公識俯伏之機達化裁之變值茲柄用必將大究厥施相時審勢明罰勅法補偏救敝興廢興廢選將任賢疆兵足食西制吐蕃北制瓦剌于以寧謐邊圉弼成海宇以光昭代文明之盛以副當寧

委任之意不徒旬宣勞來聲容議論若是焉而已也
其不佞寔於公有至望焉

代送張襄陽序

今天下才儻奇麗崇言宏議之士豈少哉蓋彬彬乎
雲會風流繼踵海內矣至揆厥初以要久遠鮮不殊
軌此豈閱歷摩厲者反始進之時不若而氣志盛衰
之相越邪夫亦以見無定理故守無定力而時靡波
頽馳逐上下向之激昂感觸于真機之發動者不有
憤懣不平之氣則有抑鬱無聊之情而窮悔遷淪舉
其生平所尚者甘棄之若弁髦矣是故人才所以多

賴于培養而匪能自樹立歷變貞一者不可與語乎
其至也南車駕郎長洲張君士弘始以進士補刑科
給事遂上疏乞宏聖度廣延納上俞之繼因各省
官司及民間奏疏多支辭蔓說牽引不辜溷瀆聖聰
復上疏約辭慎獄上下其議刻置長安右門外乃
後因議先聖祀典忤旨下獄謫閩藩幕司量移進賢
令懷慶郡丞奔走風塵從事簿牒期會積有歲年大
君以黃門諫議左右侍從一朝罹此苟內外清濁崇
卑淹速少嬰念慮見勢利之華闇德義之實其能不
顧盼俯仰據傲乘便管蜚景附以踣騰通顯哉君願

恬默自居隨所任使以圖報稱養士治民在有成績
及司車駕贊理兵政亦綽有端緒古稱官守盡職言
責盡忠君殆若而人矣謂爲有定見定力者非邪廼
茲守襄陽其又肯負乎哉夫襄陽跨荆蜀控關洛湖
南著郡也維昔蒞茲上者若關雲長之威震華夏羊
叔子之綏懷遠近杜元凱之立泮宮修堰漕皆盛有
聲稱利賴當時貽思後世褒然爲漢晉名臣寔維在
是是後尹師魯歐陽永叔皆嘗以諫謫茲郡一監酒
稅一爲縣令雖二公勲德文章冠冕宋室于此則以
權力未稱不遂厥施君今之行其始雖以諫出而乃
茲委任職專一而殆非尹歐當日之官而與漢晉三
公幾等埒矣行將登峴山之亭俯沉碑之潭其能不
惕然以思慨然以興而與之方軌並駕矣乎他日襄
之人有頌良二千石者寔於君乎屬望矣

代送錢尚書序

周官大司徒掌邦教敷五典擾兆民邇厥所從自堯
之命契則旣有然矣漢魏以下置尚書度支專土財
帛委輸軍國支計以至於今之戶曹雖職列地官而
徵其承受攷其沿革要勿外於民度金倉之屬而教
典無庸焉豈經國建官者盡失先王之初意哉夫亦

第其體要酌其會通而與世劑量之道歸焉耳故曰
食節事時民咸安其居樂事勸功尊君親上然後興
學其意蓋謂此云至其脉絡相承鉅細聯屬則祿秩
禮樂兵戎賞罰工虞凡所經費胥于是乎取資焉是
故得其人則庶事理不得其人則庶事廢任斯職者
誠有如地道然山嶽河海之震奠物產生殖之休否
咸所維繫是亦職誠重且大非有承載容畜體國經
野者鮮克舉之也桐峒錢公始以進士起家爲良有
司爲名御史歷方岳諸司進卿寺進御史中丞其所
臨蒞吳越燕趙荆楚冀豫貴竹百粵諸方若其邦國

才峯集卷四

十一

張本

都鄙夷蠻夷貉之俗與其財用穀畜之數夷險通塞
利害之宜靡不周知逆處而所在士民謳歌贊誦厥
旣懋績中外揚休士林矣迺今以尚書官留都掌戶
曹經制機宜動中物則食貨之登耗轉輸之勞逸用
度之多寡蓋藏之盈虛不事按簿書促期會而輕重
可否之間用非足國裕民之道蓋其應用之不窮者
寔其涵練之有素也謂其克舉司徒之職以輔翊我
聖天子禮樂文章之教敷典擾民之治者非公其人
邪昔鄆桓公爲尉司徒善於其職詩人爲之賦緇衣
而君牙克篤忠貞勞有成績穆王銘書于太常自公

之南也南國之卿士大夫庶民小子固莫不有縉衣
好賢之念矣今以政成歸報於明堂 天子其將不
嘉乃丕績以昭國家之有又乎

贈葉教諭序

婺源葉君教慈谿學之五年武進薛子來知縣事每
至學宮講論經理剖析疑義彼此談駁闡發未明久
之益習見其端方雅重愜悞無華以道自持表裏協
一敦學不倦將窮極本原而會通之諸生有率教者
延接無時進退以禮務相與刮劑期脫徒泥俗而進
諸古有不然者則哀矜惻怛冀在感動罔事夏楚諸

生安之其諸學士大夫不問其華要散逸待之一以
誠懇而愛憎毀譽久近得失未嘗一置於懷也先歲
甲午考試關中號稱得士旣修浙省誌多所記纂君
所至未嘗求合於人及吾見四方人士亦自往往問
葉先生云今年春御史汝陽張公巡行東浙聲色所
加官僚屏息而望塵下拜者且猶未免叱咤一時論
者咸謂君古貌古心其將不便於御史之庭矣旣乃
進止自若應對從容未嘗少徇張公爲霽容加禮及
去復移檄縣官激勸特至此可見誠篤所孚雖盛威
厲色者亦自相入彼屈身枉道者何爲哉夫亦自夷

其師範焉耳是君既孚於遠近上下之人爲弟子者將不益知所以自恃而天理之在人心其究不在於紛華盛麗逢迎容悅間也然是亦就君之所孚者言耳使在我者既盡而自反無闕就有不孚亦與君何重輕哉君性資淳厚固本諸天及觀其伯兄東昌公爲賢大守其諸子僉憲君爲名督學則家庭之所漸者厥亦有自矣素教預養之功又安可誣也

贈王縣丞序

維揚王子種學績文久困場屋以貢爲太學生薛子家食時江北士人往往稱其人云然未之識也及薛

子知慈谿之三月御史汝陽張公以按事至薛子病火欲辭去公留之時王子爲台州太平丞適以事謁公于慈谿公命之曰薛尹苦煩縣缺丞尉其一切瑣瑣舊事汝其暫爲分之於是王子留慈慈故多狡黠凡賦稅徵輸討戶上供者悉爲所侵漁積習成俗上下蒙蔽倚藉勢力動持長吏先是爲令者率多敗事去繼之者束手受制莫敢可否事王子乃昌言曰余受御史委而今復有薛子乃更不得施用則丞不負余而余負丞矣於是檢舊牒搜微剔隱務殫厥心力得一弊與夫作奸犯科者輒書片紙移縣庭或械其

人繫獄諸奸民不便者咸復口語籍籍冀少縱王子持之愈堅如是者幾一月乃別去因徵贈言于薛子薛子思曩在京師銓曹授知慈谿縣事一時士人咸謂薛子茲行蓋岌岌乎其難哉予謂盡誠爲之不容而後去如程伊川之所以答呂進伯者斯亦已矣慈谿縱難治其若我何然余身當其事不敢畏難無足異者乃今王子丞太平而顧以身任怨唯知是非可否罔恤毀譽利害其真有的見定力而豈涉筆占位目吏問可不可者哉曩時江北士人之所稱信無負云嗚呼使向之爲慈者皆若而人焉則慈亦何至敝壞如今日也

代贈徐生序

漢司馬遷作貨殖傳班固譏其崇勢利而羞賤貧夫遷良史而固亦其儔也爲貨殖作傳豈其微哉而固獨弗之知也固弗之知而天下後世皆以其言爲信然吾於孟堅有遺憾矣嘗觀漢制論刑輕重視所贖有差咸獲免有能輸金錢龜貝刀布入粟塞下者率得補官維時司馬相如以文學辭賦雄藝林猶且入貲爲郎而卜式父子皆以助邊拜爵積官至通顯子長獨遭李陵之禍幽於縲紲竟下腐刑夫固無以爲

之贖也治生獨可少哉貨殖列傳固其玩世自嘲之意而謂禮節榮辱之知由於倉廩衣食及所謂人富而仁義附焉者亦其探本之論也今徐生藉父世業日益饒裕知以權變勇以決斷仁以取與古之善言治生者固已得其遺法矣迺入貲拜秩膺仕者冠服豈以誇金章耀閭里哉無亦以有財者宜輸委以佐司國計者之經費云爾然吾觀世之修行獨立者每耻言食貨至入貲拜爵事則又往往沮抑勿論斯固孟堅譏子長作傳之意夫亦以其人之多弗克自樹立也及觀卜式諫止武帝興利欲罷鹽鐵船算當時東閣石渠文學則未嘗有言及此者雖其目貲奮迹亦何損焉司馬相如子虛大人賦及諫獵疏封禪書固多虛詞濫說而楊子雲謂其曲終奏雅然其要歸引之節儉太史公謂其與詩之風諫何異允若茲亦奚問其以貲爲郎也徐生信能自勗則蜚聲騰茂固自有地而非崇勢利羞賤貧之謂矣余不敢薄待徐生是故敬進斯言竊附於以規不以頌之義

送謝廉使序

自昔爲天下國家者各因時以立政而唯朝會最爲大典豈直以明上下之分繫荒服之心哉蓋黜陟

賞行焉而賢不肖之進退乃庶官視以爲勸懲而
民之休戚天下之安危寔於是乎在也是故虞廷羣
后肆覲周官六年五服一朝其風勵人才以致盛治
者至今猶可想見迨我 國家定爲三年一朝之制
天下布按諸司暨府若州縣各述所職以入覲以聽
吏部都察院考察去留而尚書都御史以下當事者
唯布政按察使之言是聽而按察使則廉訪激揚總
外臺風紀之任尤爲部院所倚重唯按察使得其人
則好惡愛憎一出於公而恩仇德怨不能行於其間
由是庶官之賢否不啻妍醜之在鑑低昂之在衡罔

弗允協而部院之去留真足以爲懲勸民 世道不
有攸賴哉反是則有不忍言者矣矧今兩京畿外爲
省者凡十有三而浙江寔居其首故考察之序必先
浙江而以次及於諸省則浙之按察使尤爲天下之
望浙中稱平天下其胥倣矣然則少溪謝公茲行其
所關繫豈不甚重且大哉公昔以進士起家爲名御
史按歷諸省督學畿內文章政事裒然著稱而弘度
厚養以懋經綸之業者每注意於天下之人才雖未
及識面者其賢不肖固已知之素矣矧今長憲於浙
則一省庶官近在所隸之下有能遁情於平衡空鑑

之外者哉由是近法遠稽而天下之憑藉將於是乎
在此吾於公之行所以不能無厚望也昔范文正謂
一路之休戚係於一人之賢否故其去留之際每主
於嚴韓忠憲見天下諸路擔拾官吏小過則愀然不
懌謂不當錮之於聖世故其執政之時恒主於寬二
公皆宋室名臣各有所見而要其至意未嘗不同吾
固望少溪公爲今之韓范敢述以獻從者

送陳兵憲序

少岳陳公守吾常之三年適海寇挾倭夷爲亂沿浙
深入直犯蘇松之境將踰泮山以濟上流公出謀發

文獻卷十四

十八

鹿

慮聚兵除器寇不敢窺我境上未幾公卽受簡命
爲浙江按察副使職專備倭奉聖書從事戒行郡

憲徐君暨吾邑令萬君後先致辭問贈言於薛子薛

子謂公以名御史歷令官出入中外凡若干年德政

數被所在著稱固無俟余言而飾情獻諛諛亦非公

之所樂聞也雖然樊侯城齊每懷靡及仲氏去魯問

何以贈是君子之心固惟日不足而公之茲行又豈

無所采擇哉余不敢汎有所及只如近日東南所患

莫急於海上之事而朝廷之所以汲汲用公者亦

甚以海上爲急余間歲在浙間俗觀風嘗竊聞一二

請就與公商之夫天下之勢所恃者民心所憑者士
論而吾人之欲有爲於天下其所憑恃者亦唯在此
而已乃今浙中瀕海處所習於番舶之利而禁令不
行民心士論蓋多搖惑於其間而制使重臣亦率爲
掣肘寇之滋蔓寔由於此今之當事者過自疑畏豈
非老成持重將欲匿瑕含垢旋底消弭以圖萬全乎
吾恐方萌之端蚤已不能逆折豫防而已成之勢安
能保其不愈熾而奔潰也夫去草繁苗除惡務本昔
人之論亦自有不易之道誠於此而留意焉則重門
擊柝且可以禦暴客矧山海限隔不假以梯航叢爾

醜類豈真能飛渡耶但民無定志士鮮公論積習已
深卒難開諭雖其目爲一身一家計者亦惟圖旦夕
目前之利而不虞深長久遠之害矧欲其有大人之
志天下之慮者誠不一二見也此其漸涵化誨之方
斟酌劑量之用諳練閱歷如公必自有相機順應之
妙矣卽今思質中丞當分閩授鉞之任甚能開誠布
公廣屈羣策憶其東巡余嘗與言於錢塘江上見其
躍躍動色公茲行哉凡所當爲與所得爲者協恭共
濟不阻不撓則民心士論當自有反正之漸而東南

之警行將有盪定之期固可計日而俟矣余特敢爲

探本之論以復二君之請用告從者以禪末議公試以問之中丞公其尚以余言爲何如哉

送管叅政序

歲已亥復齋管公以江西按察副使進陝西布政司叅政瀕行江之官屬士民咸餞送郊外惻惻不忍釋去其僚友恒溪尹憲長屬余贈之言某乃前致辭曰公之茲行也其將叅知陝之政乎夫陝古雍州也介隴函蕭散武曠諸關黃河左右旋繞渭汭漆沮弦蒲荆岐終南龍門烏鼠諸川藪巖谷環映襟帶形勝莫強焉惟其土厚水深故其人多厚重質直周邑岐豐

王道四達詩人歌之謂之二南旣分命周召益熾以昌而二公相業寔是焉肇厥後東遷秦襄始封康孝以下無衣同仇繼作悍然有招八州朝同列之氣夫地一也周則爲周秦則爲秦淑慝汗隆其人殊也漢晉西魏後周隋唐咸都咸陽維時京兆馮翊扶風弘農張掖酒泉勝肅甘洮諸路安危沒服亦唯其人也迨宋中葉夏銀綬宥靜靈鹽甘涼瓜沙沒諸西夏慶曆分緣邊爲秦鳳涇原環慶鄜延四路熙寧以熙河洮岷通遠又爲一路各置制帥材官而韓范經畫大著聲稱西人不敢窺伺民藉以寧遂爲宋室名相今

四夷讐服疆陲宴然而聖化所被寔唯承宣者爲之
公冲襟雅度經濟夙閑建白在諫垣明讞在觀察聲
實所加罔弗孚裕茲行也其將爲周召矣乎其將爲
韓范矣乎吾黨深有望焉矣

送張運副序

代聞石塘作

自昔議鹽政者以河東安解二池比淮海爲重迄今
邊餉暨宗室祿米自田賦之外大都取給於鹽鹽又
河東爲多故都轉運司之設凡以慎二池之防總三
場之課以裨軍國之需是可以易視乎哉吾鄆張君
用正經留都樞府及碁改民部郎格于例遂出貳河

東鹽運鄉之士人咸謂其才不宜遠去請余贈之言
余謂君子將欲大所樹立無擇遠近難易巨細繁簡
矧張君少受若翁正菴君之教率履唯謹博藝經志
練達物情始筮仕佐京郡馬政即有能聲究厥所施
則經世之業固其所優爲者何有於鹽政哉昔管仲
對桓公曰海王之國官其山海謹正鹽筴據有餘而
制不足執其通施以御民之利用故天下樂從也唯
是齊用富強遂霸諸侯是其關於軍國者甚重而推
行盡變以無失其自然之利者寔存乎其人也及觀
河東鹽政在宋天聖時嘗以禁塞繼用言者議始通

商及經元昊之亂詔使入中他貨遂以虛估弊旋又
禁之迨范祥定爲鈔法俾鹽直輕重勿貳與鈔相若
當時甚以爲利乃今存時帛股牢盆壕籬雖有定法
而僞滋蠹生中納支掣類非初意遂至商竈俱困賦
課野縮緩急轉輸弗獲藉以爲用不有其人孰能振
起君茲行哉酌時宜權物賈審輕重緩急以通商惠
民而泉貨流布罔有滯塞予以籍稅會程蓄餘藏羨
以爲天下利斯於經濟之學爲無負矣蓋天下之事
無一而非吾人職分之所當爲古之用世者雖皮幹
筋角竹箭羽毛齒革之屬升斗釜鍾尺寸尋丈之數
靡不究心殫力矧茲軍國之大政乎君其懋哉

方山薛先生全集卷十五

序

送馬西玄序

天下之道翕則能闢精則能字物類胥動本標胥應
玄默深微妙通罔解故陽燧見日則然方諸見月則
流夫其貞明之體曷嘗屑屑於燥炎濕潤以自炫其
成能哉維其翕水火之精精專神應所以闢而孚者
彼此莫喻也是故有道君子超世藏用修身軌物機
運而弗揚化行而弗宰循其實弗居其名要諸久弗
譁其近所以卒能成天下之務也斯其人豈易得哉

玄龜卷十五

一

何礼

余少時則聞關中多才賢意必有若人者出乎其間
及長游京師乃益習聞諸名公而西玄公則其一云
公茲以南祭酒進佐禮卿人皆謂公素明禮樂必且
飾儀敷文增修縉節以章盛美余竊觀公豈其有至
意存焉者乎夫自太上忘言旋不可復無言之訓厥
指逾遠於是博學疑聖華誣脅衆者往往列道而議
分徒而訟以要名譽于天下學術日裂人才日靡至
于今余益益難言之矣公爲祭酒巖峙山立規旋矩
折望法者無爲近儀者無事學徒千數喁喁嚮風日
改月化率各隨才成就譬諸蒲且弋羽于蒼穹詹何

鷺鱗于淵澤精神所至曾何假于言說哉公古雍州之豪傑知行忘助先後合一偏全同異之辨豈不能剖析幾微修其辭說以角門戶侈徒黨哉公亦誠見夫實行之當敦而化導轉移之機不在彼而在此耳吾是以知公茲行其必以教國子者以贊禮樂體中和之道究制作之原所謂德成而上藝成而下者于茲益有辨焉矣昔有虞盛時舜命伯夷典禮后夔與樂自寅清直寬剛簡數語之齊無聞焉矧今 聖天子敬一傳心禮樂明備公從容贊襄亦何爲哉憶嘗見公每惜賈誼之才而高漢文之元謂其愛養生息海內富庶庶幾成康豈真以禮樂未遑爲是邪夫亦以協氣嘉生人心歡悅而禮樂斯有所措也公茲往哉漢世故事已無足論虞舜在上可以亮天工而和神人矣

送周興化序

前年司寇議國戚獄從緩詔出其屬凡若干人補外澗山周君與焉君旣守鄧尋貳汝寧汝鄧皆河南地歲比不登征徭荐重君悉心力務在生活安全苟可得爲不拘文牽俗唯是民皆愛戴不知其嘗爲法吏也及進南司空屯田郎甫蒞任卽釐革奸弊毅然行

之不爲左右所動薛子以是益信君至是擢守興化
吾鄉大夫士謂君蓋余所知者因屬贈言其不佞乃
告之曰今天下士誦說孔子彬彬于六藝之科動駕
聖軌論治必稱先王宜其在位多君子而吏治蒸蒸
黎民乂安乃竟化離蕩析而怨咨愁嘆之聲充斥里
閭及展轉以填溝壑者靡有紀極也豈氣運有上下
而叔季之世終不可以追隆古是故言道德者溺其
職邪無乃務華鮮實徒文具而無惻隱之心蓋亦人
事然爾不然史稱漢武之世外攘夷狄內改法度明
堂建章栢梁承露創造制作惟日紛紛民用彫敝時

少能以治化稱者唯江都相董仲舒內史兒寬類皆
儒者通於世務明習文法以經術潤飾吏事民藉以
安天子亦倚重焉時曷病夫人哉乃茲學士羞稱漢
儒而究厥體用反若出其下者可以見華實之辨民
生休戚之所關也余觀澱山君敦本尚實篤於自信
居常留意習俗淳漓及民所疾苦此其意慮懇切豈
投機進會隨世以就功名者爾邪茲行守興興爲閩
粵著郡比屋業儒昔人謂爲海濱鄒魯君以實心施
之有政廣求民瘼觀納風謠躬率理學以倡士趨不
巽獻以矯名不媮媮以徇俗則其人之易于作乎殆

又不啻若汝鄧焉者而漢世良吏信不足爲矣余以是預爲君賀而因以賀興之人得良大夫也君其往哉

送王汝中序

王子汝中將奏績京師問贈言于薛子薛子曰汝中陽明高第弟子也豈待余言者哉雖然亦嘗竊觀之周末孔子始生會羲農堯舜禹湯文武周公之道叙易書詩禮樂春秋以教天下而天下問德請業之士相率而歸之者一時蓋三千焉雖畏匡厄陳干七十餘君不用歷經險難皆絃歌鼓瑟無忍攜貳其嗜師

門之道譬之羣飲江河各足其量成德達材靡有棄物然仲尼方且似不能言語其門人則曰予欲無言蓋默而成之不言而信所以聖人之道卒大昌明于天下及仲尼旣沒其徒離散分處諸侯之國各以其學教弟子本源旣遠末流益分誕章乖離飾虛鼓衆於是莊周列禦寇荀卿李斯之徒往往附會仲尼以恣其無忌憚之說而道術日益紛裂卒至釀成坑焚之慘而先王懿訓幾至煨燼謂爲多言之禍非邪賴道原于天天不息道亦不息漢董仲舒隋王仲淹唐

韓退之皆稍稍倡絕學于其間延及宋之周程遂隳

圖著論而斯道大爲發明厥後門戶競起分徒角立
議論愈多黨禁旋作噫此豈天寔爲之要亦人事然
也迨我 明興 高皇帝闡明正學崇尚真儒其時
佐命元勳暨侍從諸臣百工庶士咸敦本尚實惻惻
無華學術習俗駸駸與三代同風自後人文日靡學
者頗事奇勝於是矜文辭者綴緝秦漢晉唐之糟粕
而身心性命漫不知究此固無足道其諸高談理學
者輒又致詳於德性易簡之說而氣節文章政事一
切甲之而不論專主無適無莫不信不果而唯義所
在多從濶畧言語者什九躬行者什一唯是無以允

協衆心遂譁羣議未見至誠動物而忽已成江河相
激之勢吾蓋不知其所終也噫此豈 祖宗養士之
貽謀與 今天子敬一傳心風範宇內之初意哉汝
中懇懇論學不安凡近其所以成已成物者將何如
以究竟乎憶往余宰慈谿唐應德謂余曰山陰王汝
中可特訪之及余改教江西羅達夫又每問汝中議
論起居乃今同官留都又見留都士夫自鄉謙之以
下多與王子相習夫一時志學好修之士其勤倦企
慕汝中者若此而豈徒哉汝中蓋必有以研其幾而
慎所趨矣若其官兵部爲車駕爲武選固王子餘事

不道道王子之所從事而世道之尤繫者因贈其
而請所以處我

送喬戶部序

陶唐氏以前人各務盡己責咸思奮庸雖幹旋玄造
丕贊生成亦視爲常分不知有功又惡知所謂奏功
邪涉虞稍異矣故曰三載考績三考黜陟幽明然當
其時水土教刑工虞禮樂納言唯以能其官寅恭和
秉濟濟相讓雖時亮天功亦奚嘗自言於其上哉此
后夔擊石拊石之言說者謂其益稷之文之誤無疑
也至周計吏法備月要日成歲會太宰執以詔王廢

置誅賞此其意固已漸漓于古然以德以功以能而
士人各知所興起漢唐以下計簿具文豈惟矜功眩
能且未免飾名巧致以邀上賞華實短長混淆逆置
於是始去古遠甚人才日靡世道因以流矣此豈古
今人真不相及而上之人終莫能振勵之邪蓋徇俗
馮生唯以便其身圖而勢趨會歸自不覺其一至是
爾世有賢者秉道御化遐覽旁施其視天下事雖後
先千百世與吾競不相值有未當意直欲更訂逆圖
矧身受若事顧有待於上人之稽閱課試銖縷歲月
哉頃觀三石喬子博藝經籍雅志先王蓋賢者也方

其產關中關中號稱多士纔一出以其緒業應有司
有司首錄氏名再進南宮獻策闕下咸上第斯其譽
望固已籍籍足人聽聞矣乃不媚權貴人置身通顯
僅官于南南又戶部錢穀出納惟允司會悉當釐刷
興飭殫旣乃心三年告厥成事請詣銓考牒奏制也
制所當爲喬子爲之其所不得爲者喬子有天下度
能無念慮冀一盡志効情乎哉古者敷言試功並舉
茲言有專官敷言之典祇具故事喬子行豈將遂應
故事邪昔賈誼去長沙逾年召見宣室論對夜分君
爲前席然終不一及曩時治安太息事豈誼練達之

後所見反不如前而厝火積薪之憂惻然無與哉誼
亦懲絳灌東陽馮敬之屬諸尚在列也乃今當路暨
百執事斷斷有客長養才彥類非漢朝公卿儔比况
值戎馬交馳綠邊諸鎮單弱苦無爲所喬子生長西
北習聞屢見加之東南民力困於冗食空杼傾困不
足以給徵輸而乘除根究總爲虛費此又其服官閱
歷所深虞而隱括者也變通經濟以圖久安長治寧
能不爲謀謨廟堂者一商之良不出位洪範稽疑士
庶人可與大謀矧茲有祿無慮卑峻豐約位固無不

在焉喬子精其義者可曰談何容易遂讓弗爲哉關

中諸君子仕南國者乞言以贈喬子余唯於常職之外更有望於賢者而陟明序進之說諒其所厭聞矣

送李叅軍序

余少時則聞海虞有李文安公者云公起家進士歷官翰林侍讀學士至禮部尚書正德初值逆瑾亂政公持正不屈遂致仕去瑾誅詔起公不出稱爲石城雪樵其風節可想矣余蓋未之及見也乃今見其子學樵君不可以自慰邪君以公蔭爲太學生授官光祿署丞改上林苑監出入禁近者凡若干年竟改南右府經歷大都士人重內輕外南雖舊都去今京師遠在二千里外馳騫進取奔走形勢者視之不啻若外省然君顧樂官于南此其意豈尋常淺近者可測識哉吾嘗觀自昔世卿大家子姓藉其先人之餘而朱丹其轂者初非不炫然華耀也溺而不止以自貽其戚若晉樂氏楚子文之後者將何賴焉學樵君靖恭以居位兢業以履盈退遜以安節其真得雪樵氏之遺矣可不謂賢乎宋呂原明張敬夫皆以恩蔭補官匪直善于其職無忝于正獻忠獻二公之後且吾道之傳卒亦有賴君循是以入即斯人可企者有不爲而後可以有爲不可以預期待耶君茲考績京

師吾鄉學士大夫屬余贈君以言君雅厚余余不敢以薄待君故以是言進若夫懋官懋賞則自有常典在也不書

送陸思南序

晉川陸子爲南臺御史之又明年奉命巡視江上激揚修舉旋已風動區域銓曹以思南遠在徼外華夷雜居動輒有警匪有才望者鮮克率服議簡才御史守之遂擢晉川子去去之日鄉之學士大夫仕於南者咸稱其才而惜其去屬薛子贈之言薛子曰古之才也一今之才也二古之才也爲定名今之才也

爲虛位是故高陽八才臯陶九德其究一也迨后敬仲以仗義興齊國僑以修辭扞鄭君子於其才尚不能無擬議焉矧夫辦事簿籍呈能要約儗習儀文出入機數者其能以致遠乎哉故曰忠信篤敬蠻貊可行斯古之所謂才也又曰啓明象恭靜言庸違斯古之所謂匪才也且今之俗習去古遠甚破觚斲雕而渾樸以散繁章縟節而敦龐以漓輸衷懇欵胥飲以和而戈矛森列揚眉激昂倡言以正而綱維具亡大都中土蓋已什九而今之所謂才者可知矣遐荒部落雖號冥頑而慙直朴畧猶有古之遺焉率之以誠

鮮不孚者病文從野仲尼所以惓惓而浮海居夷識者知其非以辭也昔成都雜夷文翁至而人皆興學渤海弄兵龔遂至而盜皆爲農二子夫人所知也曷嘗矜技能炫智術而鼓舞更張以 其視聽圉其利害哉夫亦惻惻無華不墮乎忠信爲敬之訓而庶幾乎古之所謂才爾始晉川子筮仕宰玉山吾嘗一入其境見其居者有息肩之樂行者有出途之願而玉山之民謳歌之及徵爲南御史則又見其慷慨明達憲度以貞而南之士人罔弗宜焉是又豈飾情修容襲取矯強之所能哉夫今之思南固遠於成都渤海也其人之慙直朴畧較諸江之左右更易孚也晉川子率其素履以往則漢良二千石之治行將復見而忠信篤敬之才於茲乎再試矣他日舉漢世故事俾公卿選諸所表晉川子亦又奚讓焉

送胡肇慶序

昔在成都周盛時敦率教典凡八卿大夫元士適子咸論年入學與俊造並進於朝故召平淮君牙纘服載德奕美天下稱世臣焉迨其季敝化奢麗後蹈商之末習於是詩刺尹氏春秋惡宋世爲大夫勲閔子姓遂與選舉殊科而崇德象賢之意日微余以是每

漢宋之呂原明張敬夫真足以繼正獻忠獻二公之
後而世祿曷嘗爲人累哉始余弱冠即聞胡端敏公
名若其發宸庶人反狀及論吟密事未嘗不想見其
心胸面目乃後其子顏溪君爲南宗人經歷相觀論
議知其不允余固已慶賢者之有後矣今年冬君出
端敏公年譜歷履請余作傳尚未屬稿而君適擢知
肇慶或謂數年來銓曹用人重北輕南凡南官外補
率多遐遠僻隘而蔭襲者則又視其先世之存亡盛
衰以爲輕重肇慶東廣之名郡也端敏旣亡君又孤
貧且爲南官何以得此哉余惟天之立君君之命相
與夫小大庶官百執事之設凡以爲民而已古之仕
者內爲卿士外爲岳牧入則贊理出則旬宣協恭和
衷各盡已職以求底績固無內外重輕之別也自怙
權憑勢矜寵夸榮者旋作遂重內輕外而爲民之初
意漸滅漸盡於是投荒登仙之說蔓延於天下而士
大夫曲爲趨避恬不爲恤延至於今雖兩都並重隱
曷嘗有定哉蓋銓司得人則度德命官量才授任惟
其人而不惟其地不得其人則拘文牽俗踵敝承訛又
其甚也將善惡混淆賢不肖倒置而要其究竟豈止

以南北爲重輕云爾哉君古雅端不徇時俗筮仕
北督府經歷卽與權貴相忤乞就南官已綽有端敏
公之風矣銓言乃請于 朝遂有 命蓋寔象賢之
意故不以南北爲別科目蔭襲爲限不可謂不度德
量才者也然則君之往也寧無明發之懷而以古豪
傑自待乎唯爾先公嘗爲太子寶慶德教所加夷民
效順廣西湖南稱思至今君體而行之則肇慶擬之
二郡尤易爲者一舉而忠孝兩盡君實其人矣追迹
張呂廷紹牙虎由此其進孰謂古人終不可及邪君
之寮友相率請余言以贈君行君雅善余余故不以
世俗望君其尚有以信余之言哉

送蘇紹序

高集卷十五

十三

何礼

昔許昌斬裁之氏有言曰士之品有三志於道德志
於功名志於富貴此其言豈不盡乎天下之人哉然
可以論物情未可以品士類 仲尼曰行已有耻孟
軻氏曰無恆產而有恆心於一 道可識矣蓋必

有耻有心斯其爲志於道德 可以言士否則雖

徒而與於士之品乎哉伊尹周公夾輔商周亨屯拯
溺功覆天下阿衡冢宰位極人臣其功名富貴後世

莫加焉夫其志何志哉觀諸伊訓周誥凡所以畜謀發慮亮天工而康兆民者一惟此道此德焉耳矣卒之功成名立而富貴隨之固其推之而不能去者耳曷嘗先有意以逆之邪奈何世變日趨人心陷溺不惟道德風流漸就漸滅至欲以功名自見者亦率難其人唯富且貴日相馳逐苟可得之無所不至於是飾道德獵功名以相誇毘而凡所以自炫於世者雖種種殊別要其志罔非爲富貴圖也自茲以往天下殆將無士而斯民之溺誰其援之今 天子軫念生靈側席求士下詔銓司大行黜陟慎擇守臣以慰隱

憂唯是蘇子遂擢守紹興夫紹興浙之名郡也當事者豈漫與而姑試之哉寔以蘇子嘗爲御史及謫而起爲南兵部每聚徒講論輒以有教無類自負意其或志於道德者也故有是擢茲往紹興紹興爲陽明王先生之鄉其嘉言善行固其士人所飭聞而夙習者子能以誠心孚之於上則因性牖民由俗爲治而一郡之三代固可以坐而致者不然吾恐巾舄充庭類皆無實適爲郡治之累矣憶漢盛時多良二千石而文翁在蜀尤爲著稱豈以興學養士爲可後哉寔願於名實真僞之際求諸心而辨之早耳或謂道德

功力各以其時而俗士苦不知變噫豈其然哉三代
之民心亘古今如一日而信道執德之士固未嘗受
變於俗彼功力之說直邵子衰世之論而可遽以爲
憑藉哉矧我 祖宗純任道德慎重守令陶公安守
饒州而召爲學士劉公觀守嘉興而入爲司徒今
主上法 祖致治患無其人耳有若人焉必將褻然
爲舉首矣太守爲一方長伯有民人有社稷雖伊周
之業由此發軔而有教無類又蘇子所自負者故吾
亦以孔孟之所謂士者望之也能勿信余之言而可
以自負自欺乎哉

別西磐張公序

古集卷五

十四

俞庭

天下之士相遇固難而相信尤難也生不同時者固
限於世代之先後而生同其時者則又或阻於聲教
之隔越故孟軻私淑諸人恨未得爲仲尼之徒而吳
公子札旣聘上國猶不能與於顏曾之列此其相遇
不難矣乎生同時矣而又相與以周旋矣然或意氣
之未孚或終始之未徹故孤偃從重耳於外十有九
年及其歸國猶沉璧以自誓呂申公薦常秩秩竟改
節而申公抱快以終身此其相信不尤難矣乎旂少
貧賤學與時違及走仕途言行多忤於俗公卿大臣

之門無可藉以進而亦不敢有意於求聞然於天下之賢人君子耆德元老一從士人間有得則心輒向往而亦不忍果於自棄今西磐公生長三晉宅於平陽蒲阪之間稟三光五嶽之完氣襲陶唐有虞氏之遺風爲世大儒爲時名臣蓋自文清公之後而再見者也旂嘗庶幾見之而不可必得今年春制應考察京官值南太宰缺難其人 天子特起公於家於是公年且七十有六矣聞命不遠數千里馳至旂時從諸司逆公於龍江關上入揖於靖海寺中公謂旂曰若爲考功郎中乎人才難得而終身廢棄決於一旦

可輕以去之邪生民疾苦而一路之哭係於一人可輕以留之邪子必有如不得已之心而後可以執斯役也旂不敢對旣而竊思之天下之事必相遇而後可與有成必相信而後可以言遇今且卽事矣傾蓋旦夕之間而欲定去留人才之計容默默已哉遂前致辭曰旂不敢負此心負人才以上負 朝廷卽如公平生道德在士林勲名在朝野今晚年此出無非爲國家計爲生民計爲人才計也旂亦何忍負之公曰吾亦知子雖然尚慎之哉旣公蒞部甫五日卽會右都御史石岡王公僉都御史石淵傳公暨大小九

公合文武諸司而羣議之旂侍立公聞可否稽素覈
只公聽並觀叅駁往復斟酌劑量而黜降之數始定
時四月六日也是日公督旂自夜達旦具疏差官馳
驛永程以進獲奉 俞旨下冢宰咨南部轉行各官
欽遵如制旣而北御史桂榮劾旂肆意行事不足以
當考功職司并誣旂筮仕改官之由疏入仰賴 聖
明念考察重典不許輕變將旂薄責補外旂聞報感
激恐懼遂解印以歸旂自惟菲薄物望素輕不足論
也筮仕改官文案具在不足辨也獨念公以懇懇爲
國爲民之慮拳拳進賢退不肖之心而旂之奉行從
事萬一如言者所指則初見致公之辭將不爲大言
以欺公乎是則深可懼也公素存心天下留意人才
雖方蒞任而南官賢否知之什九公固有以信旂矣
雖然豈敢必哉旂今歸矣去公之日遠矣然天佑純
德以培元氣潞公再出司馬復相公固未涯也尚願
公在南則詢之於南人入朝則詢之於朝士異時優
游林壑則詢之於道路旂雖鄙陋遲以數年論將自
定而今日之舉庶乎真不負公而旂亦可以自信矣
詩言在茲昭然契券執以投公再拜而去

天下之士有名有實而名實之間正誠僞之介疑信之端理亂之所由出也夫謂有實斯有名而東家之丘鄴人之子其始未必有名也夫謂有名斯有實而學博行堅聚徒成黨者其究未必有實也故務實而不務名者可與言修己循名而必責實者可與言觀人不然則作僞者將自欺以欺世而徇名者將隨俗以喪真天下之事殆日趨於僞而不知其所終矣昔孔子沒而門人以有若似聖人曾子以爲不可子夏疑於西河之聖而同列罪之可以見聖門之學必核其實雖於近似彷彿者亦不容少有假借也處則相

規以實學出則相期以實政而不爲虛名無益之事猶之宮室舟車之可以利用布帛穀粟之可以厚生而生人之道不可一日闕焉者也然則志於斯道而以天下國家爲責者可漫然從事而不知所省究乎始余請教江州往來南昌者兩越歲而姜子約父獨慚於見及姜子舉進士令溧陽之二年余以考功謫歸道出境上姜子留余余怪問之姜子謂近世講學論道之士相望以起率多無實曩居南昌雖不當致疑於薛子而亦不敢遽然以進今且數年諒子久矣因出所制作及商確理道連日夜凡再信宿不欲余

去於是姜子以治行最聞被召將行薛子乃告之曰
君子之仕也凡以行其志也百司庶府無問崇卑咸
可行志而阻於勢之不能自遂者容或有之乃若志
既可行而勢又得以自遂者宰相而下莫若臺諫與
銓曹耳子今行矣不爲銓曹必爲臺諫夫銓曹掌握
人才而君子小人之進退天下之治忽安危係焉臺
諫主張國是而是非可否之論議天下之治忽安危
係焉斯二官者固極天下之選也苟居其官而於人
才國是非至公至明以核其實則巧詐橫生真僞相
冒愛憎競進而善惡混淆天下將何賴乎昔宋仁宗

朝司馬文正公曰國家采名不采實誅文不誅意則
天下皆飾名以求功巧文以逃罪矣於乎敝也久矣
豈特其時爲然哉正統間王文端公位太宰凡臺諫
出使歸者必令報其所歷人才高下以備拔用一時
號稱得人而競進之風頓息寔以當時臺諫各廉訪
得實故也姜子自家食以至筮仕時其於交游往來
間且核其實而不輕爲結納矣矧茲將陟要樞登言
路其肯羣稱而共和哉吾見抱貞以自守違衆而特
立者子必有以知之而賢者將有所恃矣術奇以謹

衆養交以市譽者子亦必有以知之而不賢者將有

所憚矣子之茲行式寔弘大吾寧能默默已乎特書以俟

送劉學正序

今之用人者每患於乏才而入仕者每患於不遇夫才未嘗乏也而仕亦未嘗不遇也儲養之弗預而取具於旦夕職業之弗盡而較計於崇卑於是用人者有乏才之嘆而入仕者有不遇之嗟矣何也應辦於目前而不慮其終倉皇於事後而不謀其始營役於身家而踈濶於理道中人以下大率然也余不佞嘗奔走世路見有論治者曰民生之不遂吏治之無道

也吏治之無道人才之不足也見有自論者曰吾道之不行吾位之不顯也吾位之不顯吾仕之不遇也余竊以爲不然國家之用人也猶匠氏之用木也木必預養而後椽桷棟梁桁櫨椽拱之用無有不適矣士之用於國家也猶木之用於匠氏也木旣成材而後椽桷棟梁桁櫨椽拱之用惟其所擇矣昔者三代之隆家塾黨庠術序旣無往而非育才之地然猶以爲未也鄉論其秀升之司徒司徒論其秀升之太學太學聚而教之遲之以九年申之以再簡夫然後論其秀者以告於王而升諸河馬司馬論其賢者以告

於王而官之唯是當時在官使者皆足以舉其職而人才之盛所以上擬唐虞也自時厥後世衰道微而師之所以爲教弟子之所以爲學者旣以大異於古而用人者又往往右吏治而忽師道於是人才日卑雖有願治之君而卒無以副其所望是故以漢宣帝之勵精而飾僞者蒙厚賞以宋神宗之有爲而偏執者獲殊遇夫宣帝固欲得不二心之臣而神宗豈不欲得帝王之佐哉然而終不可得者凡以不能素教預養而不容於遽辦也乃今郡縣皆有學而兩京各有太學良法美意其所以爲人才之儲蓄者則旣

詳且備矣夫何郡縣學職與夫六館之官自非豪傑則鮮不視爲閒散曰此仕之不遇者也姑爲祿養而已士之入鄉學與夫游太學者自非豪傑則鮮不視爲虛設曰此非造就人才之地也姑以求仕而已於是苟且文具因循歲月而不知此寔豫章榷柁之山谷也此寔培植材木之工虞也人才所由出職業所由闢誠莫要於此也此而盡道其間則旣以盡職又以儲才而吾人體用之學不在此哉余往歲丁酉校文閩中得劉君希曾知爲有道之士及其掌教元城再教宜興橫範人才以克振師道而監司督學皆交

童薦達人謂當得殊擢乃僅遷南國子學正吾固知希曾之所重者正在此而不在彼也於其行也將叙是說以質之適門人李表致諸生某等之請因書前說以歸焉

送郭副使序

夫數易者勢也不易者道也唯其勢不唯其道則爲之無本而制之在人人或得而加焉其究也必至於人已之俱失矣唯其道不唯勢則爲之有本而制之在我人不得而焉其究也必至於人已之俱得矣吾常自漢以下郡守長吏以賢能循良書諸紀志

傳諸文老者姑置勿論自余髫髻入庠校迄今濫名仕版三十年間其郡大夫之得於親炙者如宜賓王公之絕明豈弟開州李公之端方恬淡瓊山陳公之古雅敦厚遂昌應公之特十嚴密擬諸漢世之良二千石亦何讓焉蓋之四公者唯務自盡而不徇人故其張弛舉措綽有餘裕而治行卓犖亦其道然耳自時厥後常之士論漸多清議日起而守郡者或以強戾或以逢迎或以權術原其初意豈不欲厚封殖附名流要美譽以干進取而卒往往取敗以去者亦其視勢之所趨者重而所以自任者輕也自任輕則無

定見趨勢重則無定守依傍門戶綴緝支離鮮不敗矣於是言者貳於聽聞遂目常爲難治之郡而鈐司擇人亦遂以爲難而不輕授歲乙巳文水郭公以御史名西臺資望旣久當需內遷乃特簡畀是郡公固有道之士也清修古淡平心率物在郡三年道洽化流時和物阜其諸興學勸課清賦省徭恤刑息訟修廢舉墜固有人不及知而綱凡悉舉者然公雖務自韜晦不求聞達而謳歌四起薦章屢上聲稱籍籍褒然列於宜賓開州瓊山遂昌之間而吾常難治之名亦一朝洗雪於天下此豈有他哉亦唯公任道而不

任勢自信而不徇人焉耳用是而觀或者將不爲失已失人而公不爲人已之俱得者邪乃今晉副山東按察使事講武徐方徐固公御史時所按地也感恩服義已非一日茲行式昭舊職以慰東人再見之思而安定和輯固有不煩餘力者但吾常士人不忍寇恂之去河內惟願當事者舉本始元康間故事公卿缺則選諸所表庶公之德施斯溥而吾常亦求有賴焉夫公之門人邵進士明甫嘗受學于余謂公之行余不可無言余不佞竊觀公治常之易而有感於難

治之論因得夫道勢人已之說以復明甫俾書以贈

公且以論諸世之爲治者焉

送傅副使序

余方壯時游京師見京師人士盛稱傅彭原給事謂其論劾不避權貴有古諫議風裁旣以吏卿夜啓扉通闥闈狼藉選法遂上疏直言竟爲所中謫丞縣旋移胄監六館官稍遷都水主事進武庫郎中紆回曲折凡若干年矣又復以憂去今年夏六月始復補精膳余亦同日復補祠祭見君蒼顏古貌挺然若凌霜松栢而意氣多慷慨激昂及叩之則恒退讓不居笑而不答且或默如也豈所謂有理而無益於治者君子不言有能而無益於事者君子不爲君於練達之後固熟於此哉無何山東按察缺副使銓曹遂以君去而以余代君爲精膳於是禮司諸寮謂余當有言以贈君行余聞常物之大情有四行欲獨賢事欲獨能辨欲獨勝權欲獨運而善是與不善是有弗量焉其所自爲者亦有四一爲身二爲名三爲位四爲貨而得爲與不得爲有弗顧焉夫於前四者有一焉則失人於後四者有一焉則失己失己失人則天下事無一可爲而士人往往蹈焉此論人者所以發才難之歎而用人者恨不得借才於異代也今君以名諫

議而退默若此是豈欲獨賢

此獨勝獨運者耶君

不能媚權貴人以蚤致身通顯顧垂白而僅能若此是豈爲身爲名位爲貨者邪君若人也雖使於四方可也於山東何有哉夫山東古齊魯也太公治齊魯公治魯君子猶謂其後世不能無弊管仲晏子雖不爲孟氏所道而足食足兵取威定霸君子亦有取焉因時損益而與世推移正涵養深而閱歷久者之事也君寔其人也余固無以爲君贈君其往哉

送李布政序

往余在京師聞稱賢諫官者皆曰桃源李公云一時

籍籍謂公且夕華要旣乃外補江西按察司使或謂公公曰諫官行其言按察行其事言而未必行固不若見諸事之得以日盡其職也官之内外遑恤哉余聞而壯之然而未識公也歲乙巳余以南考功謫判建昌爲公屬吏見公博大渾厚中寔介介退而質諸官屬士民咸道公賢一如在京師時未幾余量移南宮公亦尋叅知浙政進按察司使今年辛亥余以學政獲侍公于浙見吏胥肅然罔不畏公威也見民農忻忻然罔不頌公仁也見學士大夫帖帖然罔不服公義也是公之明刑真足以弼教余方竊有賴焉

無何江藩缺右使銓曹以公名上 上特允之檄至
戒行凡我寮案屬余以言贈余不佞敬致辭曰公往
哉今天下稱達人者率多徇時而言及往昔則鮮有
不以爲迂者以余觀公卓有古意而余舍迂言則亦
無以爲公獻者余不敢追述邃初惟我 國家稽古
建官內有六卿外有十三布政使品秩事權胥準並
重且以藩服去京師遙遠政多統攝而一使之職寔
兼六卿所掌錢穀工虞尤所倚藉盈虛登耗上下損
益悉聽處裁無非爲足國裕民計也邇年以來邊方
多事國用 平需日增月益徵科制使絡繹道途加派

傳符勳盈几閣東南民力不啻竭焉爾矣而 上嚴責
成下希寬恤皆瞪目以視藩司值此之會可爲易處
乎哉矧江右之民負氣尚義儉用嗇施雖公之威惠
素孚其心值此力竭之際其所望於公者如饑寒之
子仰視慈父而徵科加派方日相尋公將何以慰之
乎余亦不敢遠有所引弘治中李康惠 平南昌值
劇賊驕藩內外孔棘康惠運畧應機次第安輯卽上
疏請蠲租八年雖以中官黎安欲害之而人心所屬
竟不能動江之民感其德而頌其功以至於今不衰
夫公固康惠之鄉人也今日之往江藩擬之康惠當

日之官則其勢又有可爲者也縱時事難易未可定論而以公之德之才劑量化裁於其間則雖不必拘其往轍而所以培植邦本者要必出於尋常尺度之外而江之民其重有所賴矣憶公爲諫官歷吏禮兵刑四科凡君子小人之進退典章制度之因革將畧夷情之險易獄辭民隱之通滯固嘗叅謀密勿封駁禁中其於天下之事熟諳素練如指諸掌已非一日矧又需次藩臬動經歲年躬親聽斷益習以閑又何有於江之一省乎但今之時行多遜避動爲掣肘雖理所當爲分所得爲才所能爲者亦往往因循廢閣而上下不蒙其休此余所以特舉康惠守南昌時事以激發公之素蘊而預爲江之人賀且冀公行將大用德業聞望廣被覃敷而湖南二李當赫然並稱於天下矣

送丁兵憲序

韓子視學兩浙巡歷海寧諸郡校藝之暇登進厥民父老詢其疾苦咸頓首曰瀕海小民往爲寇攘竊發倭夷驛騷苦不聊生朝不虞夕流亡失業者蓋屢屢矣旣值巡視大臣因內地奸人多爲嚮導遂窮索搜治欲草薶而禽獮之仰叩初意豈不欲立我民命但

過嚴太驟以致奸宄煽言遂不獲終事以去今幸逢
我丁公視師海上申明軍法整刷部伍島洋夷險防
禦周悉慎覈奸良刑釋咸允其有怙勢隱匿者亦皆
誨化解散於是夷寇出沒莫爲指援輒就禽勦不敢
犯我境上唯是流亡復業閭井又安我小民其有干
城矣余以語諸士諸士曰豈惟是哉丁公嚴不至苛
寬不至縱出入以度動止維則不絕任法不專尚兵
詞色所加豪右率服威懷所及攜貳格々且猶振作
藝文修明禮樂以淑我士類我士類其有師帥矣余
因歎曰有是哉孤由公之作用也而豈無所本哉曩

余在白鹿書院有感於前山長李敬子事敬子爲晦
菴高第弟子以弘教見稱于師門而經々行義名海
內人之視之一儒者耳及爲幹辦使會姚源寇作帥
漕議平之而各持其說敬子曰寇非人耶豈必皆惡
遂請自往諭以逆順禍福寇皆帖服孤山公固敬子
之鄉人也稟賦厚而造詣深閱歷久而涵養定銳志
程朱邃於問學其本原蓋自有在而發揮事業所至
輒效固儒者之作用耳豈徒事功名者可擬議哉公
往在諫垣以建白忤時謫遷量移淹洫在外亦既有
年當道諒之行且召入矣妄意者或以海上難公

不知正李敬子之所欲往者也。今觀士人之論若此，豈不適以樹公之業而永公之聞矣乎？雖然亦公之餘事也。公固不以是爲重輕也。公在海上三年，例應報績。長憲濟軒唐公同野李公述憲案諸公之意，謂余知公屬以言贈，余不佞未及詳公之素懿，爰叙士民之頌公者以贈公之行。其諸登賢陟望起滯振淹，則固當事者事也，亦非公之所計也不書。

送唐布政序

余嘗自謂君子之於天下也不可有我不可無人有我則私無人則忽私且忽而天下之事由是不可爲

矣。既涉仕路垂二十年，我則不敢有而不能不覲人之有唯是鮮克當意，寡諧于俗再起再擯而綴緝經緯，輒復斷續不成，尺幅居常靜思默注，反復其故而不甚了解及視學浙中，長憲唐公每過余論學論政，余思公爲郡縣爲部署爲藩臬，敷歷中外所在卓有成績，籍籍著稱而人已罔聞，問公何以得此公反詰余余告之故公乃曰有是哉君子固不可有我亦不可無我無我則自任者輕而或不免於隨固不可無人亦不可有人有人則任諸人者重而或不免於動譬若交際然我則不受而不能必人之不我加也譬

若稱謂然我則不諾而不能必人之不我呼也斯則
不落於人已有無之際而天下之事或者其庶幾矣
余方有味於公之言而公適有布政山東之擢諸寮
送公行屬余贈之言余固受公言者而何能爲公贈
哉然不能不爲東之人慶也夫山東古青兗之地齊
魯岱宗渤海限帶封域其土平曠沃衍其人雄偉沉
毅以尚父伯禽爲之則王道行焉以小白敬仲爲之
則霸業成焉秦漢而治行隨人而土風民俗亦畧
因之邇數年來歲有登耗河決不常轉漕踈淺丁夫
旁午兼之邊鄙多事城戍繼興工役頻繁東人告困

強壯者往往流離轉徙廬井蕪圯甚則操弓矢刀戟
呼羣躍馬從事暴客以偷旦夕之生而羸弱無依殍
於茅草沙磧泥塗潢潦者則又比比相枕藉也余嘗
往來上下蓋竊憂之一時當事者亦欲興革損益以
紓其困或又未免各持文墨議論以務已勝而適爲
多事之擾將何賴焉唯公定見定力而波蕩風靡之
中常知有我不動聲色不暴形迹而規爲舉措一觀
夫人情物理時宜事變而默識裁成能勿擾之而已
矣茲行也東人不將有息肩之期矣乎夫古今之時

不同而理同王霸之道不同而事同太公魯公孰不

知其爲王也周公逆知其後世必有強弱桓公夷吾孰不知其爲霸也仲尼深服其民到于今受賜夫固因時觀理以道揆事不當執一論也斯義也豈聲色形迹者可與知哉吾是以知公之優爲而爲東之人慶也載觀我 國家惠養黎元勤恤民隱方嶽重臣必慎簡以充以儲公卿之選洪武間則有若徐公鐸宣德中則有若劉公中敷正統初則有若王公質皆以東藩方伯召爲司徒而德業聞望垂諸不朽今公將媲美三公以需不次之擢以昭我 聖天子法祖得人之盛其在茲行矣又豈特爲東人慶而已哉

